

大方廣佛華嚴經論卷第三十四 多四

唐方山長者李通玄造

十地品第二十六之五

④第八不動地將釋此地五門如前△一釋地名目者此地何故名不動地明此位菩薩

於處世間智不須功用神智思量不思不為

而智隨萬有通化無方名為不動地△二明

此地行何行門者此地行願波羅蜜為此

智增以智體本淨以願興行轉更自在若不

以願起智恐還同二乘以願防之不令滯淨

至此地已法合得諸佛三加七種勸令念本

願起生智用任運能起廣大慈悲便能成無

作智悲任用圓滿前第七成入世間中有行

有開發此地成有行有開發中無行無開發

任智用滿大悲故仍於後善慧未自在故又

以任運智慧增明非待作意故△三善財表

法者善財於此行中所見善知識在此道場

中者明八地稱理入真智稱無作契會中義

故云在此道場中明智契中道名之為中理

無彼此我人自他名之為道場此善知識號

大願精進力救護一切眾生者明此位中方

能赴其本願救生無限為表第七地隨悲修

智者難成故此位隨智行悲濟物廣大易成

故為智體徧周十方對現隨眾生廣挾故如

響應聲無心而與一切眾音合故其智無思

與等虛空界法界一切眾生所樂心合而以

利之而無我所而無作者是故以夜天號大

願精進力救護一切眾生坐普現一切官殿

摩尼王藏師子之座者明大慈悲普覆一切

眾生為官以智對現利生為殿智無染淨為

摩尼隨居染淨而無功而廣救眾生名之爲王故普現法界國土摩尼寶網彌覆其上者表智境普含隨根設教名之爲網以智無體能現眾法而無作者名曰摩尼此明約智用利生所報依果觀因知果舉果勸因故乃至廣如經說明此八地教門是所修行之法夜多天名大願精進力是行行之人△四明於三界中此地得何解脫者明得智用利物徧周恒無功而解脫明從初地已來至於七地有爲無爲皆有修學此八地二行已終如菩薩行中此地功畢諸佛十力十八不共自在十地方終△五隨文釋義者二義如前

△一長科經意者於此八地約分十二段長科

○第一是時天王及天眾已下至一心瞻仰

欲聽法有二十二行頌明諸天聞法興供歡佛神德分

○第二時解脫月已下兩行頌明請說八地分

○第三爾時已下一段有十行經明修第八地向入無生法忍分第二隨文釋義者經云入一切法如虛空性是名得無生法忍者明初地已來至七地是順無生忍八地方得無生忍八地已前有爲無爲皆有覺觀修學至此八地二行方終自餘文義如文自明多

○第四佛子菩薩成就此忍已下有十七行經明此位菩薩入無功用分釋義中分爲四段 一佛子菩薩已下至皆悉止息有五半經明入第八不動地離一切想寂滅現前二乘滅定所不及分 二菩薩摩訶薩已下

至二行相行悉不現前可八行經明自初地
已來方便功終無功二行不現前分 三佛
子已下至皆不現前可兩行經明舉生梵世
欲界煩惱不現前喻分 四此菩薩摩訶薩
已下一行半經明菩薩心佛心菩提心涅槃
心尚不現前分經云一切聲聞辟支佛所不
能及者爲二乘是厭有證無不同有無二行
滿任無作功離諸諍諍寂滅現前有無二諍
功已滿故無有諍故五地世技達六地三空
智慧終七地大悲諸行滿八地任運無功智
自在大化利生故無作者故經云譬如比丘
具足神通得心自在者約小況大如比丘得
出三界定無三界心但隨淨定力以出三界
妙淨意化現神通其通有六一身通二天耳
通三天眼通四宿命通五他心通六漏盡通

如是二乘六通與淨土菩薩名數相似但通
用廣狹不同二乘神通變化不得徧他方佛
土淨土菩薩神通得徧他方淨土一乘菩薩
神通十方佛刹衆生刹總納於毛孔三乘以
漏盡通爲證一乘菩薩雖離諸欲不以漏盡
通爲證三乘六通皆有限量一乘十通無限
如下十通品自明如淨名經云雖行六通而
不盡漏以智自在不同小果三乘通皆有徧
來如三乘經云我欲還歸本土等是一乘菩
薩所有神通依理智印性自徧周等虛空界
應物施爲無有去來中邊之性所以一乘菩
薩不證漏盡通者爲以明處智境界不見漏
性及以無漏有取有捨萬法性自法界故以
智自在故攝生行徧故不同三乘有忻厭取
捨故是故今此以小況大喻如下以夢況法

喻者明初地至七地有學有修如夢所作未寤八地如夢已覺故萬事總無任用從智以智自在號智爲王自餘如文自明

○第五佛子此地菩薩已下一段有四十行半經明此位入無功用已諸佛以十種勸發加持分釋義中約分十二段 一佛子此菩薩已下至於此忍門有五行半經是十方諸佛現加勤修諸如來十八不共法分 二又善男子已下至汝當愍如是衆生有兩行半經是諸佛勸歎得無生忍念度煩惱惡覺衆

生分 三又善男子汝當憶念已下至智慧之門有兩行經是諸佛勸念本所誓願普大饒益一切衆生分 四又善男子已下至得此無分別法有兩行半經明諸佛勸不住法性分 五又善男子汝觀我等身相已下至

成就此事有兩行半經是諸佛加勸今修福德智慧說法音聲分 六又善男子已下至成就此法有三行半經明諸佛勸修無量法明分 七又善男子已下至通達其事有兩行經是諸佛勸修種種差別如實通達其事分如上二十行半經總有三加七勸三加者一諸佛現身二與智三言讚善哉善哉及與摩頂七勸者如上科文作七段是也 八佛子諸佛世尊已下至差別智業有兩行經明諸佛以七勸三加令起差別業分 九佛子已下至優波尼沙陀分亦不及一有七行經明已得起智門超前初發心不可比對分十何以故已下至以不動法故有五行經明得無量身語意業分 十一佛子已下至設經百歲亦不能及有三行經明舉喻況乘船

至海速疾超過百歲分 十二佛子已下至不能及有四行經明乘一乘船至此無功行海分如是勸加從十住十行十迴向十地一位初首皆諸佛勸歎加持說法者令說法故至此八地三加七勸明自修行者明自行無功所得及故於此地中法爾智現諸佛加持法相應故堪領受一切諸佛廣大法故如世帝王德備即鳳翔麟應是德所感也明此八地無功智現即十方諸佛感應是法爾合然故經云善男子此忍第一順諸佛法者明此地得無生忍非如第六七地已前順忍故此忍第一順諸佛法者明此無生忍是諸佛本體智性故善男子我等所有十力無畏者即處非處力等及四無畏是十八不共諸佛之法汝今未得者明勸昇進如來自在不令

住在無功用中十八不共者一無有悞失二無卒暴首三無忘失念四無不定心五無種種想六無不擇捨七志欲無退八精進無退九念無退十定無退十一慧無退十二解脫無退十三一切身業智為前導隨智而轉十四一切語業智為前導隨智而轉十五一切意業智為前導隨智而轉十六知過去世無著十七知未來世無著十八知現在世無著四無畏者一一切智無畏二漏盡無畏三說障道無畏四說盡苦道無畏十力如先已明如汝雖得是寂滅解脫已下勸令念未得衆生令念本願普大饒益已下通有三加七勸如文自明以此七勸令起無量差別智業如歌羅分者此云豎析人身上一毛為百分中一分或曰為十六分之一分以西域十六升

爲一斗所謂此地起智昇進不可以前地法能比對少分故優波尼沙陀分者優波此云近也沙陀云對明此地起智利物之廣大前地設經百千億不可數劫所作利益亦不比並此之少許微毫之益故爲明前地以益劣故以此地起無限化身之益故餘如文自具已上一段以明三加七勸安立法則十住十行十迴向十地等第八位中大勢共同總明十住初心一念入道生如來智慧家時一切法總具防之然法須安立次第昇進不滯諸行故令諸始發心者知軌度故從初發心興大願故令大悲智而與法身齊昇進故設教前却學者一時智有迷悟淺深自露以智境界非有前後

○第六佛子已下一段有五十九行經明此

位菩薩以自智德善知衆法差別成壞同事攝生廣大自在分釋義中約分爲八段 一佛子菩薩住此第八地已下至皆如實知有四行經明以善巧智觀世間成壞由何業因分 二又知地界小相大相已下至差別相有兩行經明地水火風大小差別相分 三知微塵細相已下至知微塵差別智有七行經明知微塵差別相分 四又知欲界色界已下至觀三界差別智有兩行半經明知三界成壞相分 五佛子此菩薩已下至悉見其身有八行半經明觀衆生身差別隨應現身分 六佛子已下至而爲現身有十二行經明現身同事分 七佛子已下至於此身現如是形有十行半經明此位菩薩住於無心想中現身同別自在分 八此菩薩知衆

生集已下至顯現色身相有十二行半經明業報身及相差別分經云觀一切智智者是根本智所行境者差別智也從根本智所行分別故觀世間成相者如世界初成及四時人天地獄畜生餓鬼等成相及以壞相皆由業成皆由業壞皆同類相應非常總爾於不遷不變無時之中見長壽見短壽生延促萬類不同自成他壞或復同時皆隨業然非真有故如是成壞劫住延促時分增減此八地菩薩悉知知地界小相大相者明知小相一塵是也大相一塵無體即廣狹悉等又如一毛孔中安立廣大世界及小世界淨穢差別咸住其中微細無限重重無礙如因陀羅網十方互參如是悉見如水火風界大小之相者且如此世界約俱舍論云安立器世界風

多四

輪最苦下其量廣無數厚十六億由旬次上水輪深厚十一億二萬三千四百半由旬下八由旬水餘結凝成金如是金剛際已上積塵成世界如楞伽經云津潤妄想能生內外水界堪能妄想能生內外火界斷截妄想能生內外地界飄動妄想能生內外風界所謂愛生水界我所堪能生於火界能所二執能生地界思想彼此能生風界愛心亡水災不及我能我所亡火災不及思想亡風災不及二禪水災不及三禪火災不及四禪風災不及爲思想絕故內無出入息外無風災內無能所外無火災內無欲愛外無水災一如色界四禪次第又以增上欲愛故能生火界即如蓮華寶女地獄以愛心取故欲愛增上便成熟銅柱等苦以熱燒燔悶絕便死而復更

多四

九

生如是一日千生萬死苦無窮極皆由愛變如增上業火成融銅猛火業風等一如說地獄等經如是業壞此位菩薩悉能如實知見經云隨何世界中所有地水火風界各若干微塵者如以積小成其大者即以隣虛塵透金透銅透鐵隙中兔毫羊毛蠶虱草子穢麥皆七七比之以成分寸尺肘弓等量知之者是凡情所知如俱舍論所說及此閻浮提洲地南北東西廣狹之量亦如彼說如人畜身以身長短以積塵之法七七比之而知人畜身之塵數者此是凡情之量見也此位菩薩世界國土人畜等身皆智眼見之知三界成壞智者三界所成時乃至大相小相此位菩薩皆智力知見婆羅門衆者淨種也刹利衆者王種毘舍衆者商估種首陀衆者農夫種

也經云此菩薩知衆生身者是業報身也國土身者或以衆生身為國土如人身於中有八萬四千戶蟲等居是已下十身悉能同別自在此菩薩知衆生集業身集何業果增上而報得身悉知之煩惱身者通三界身色身者色界身也無色身者無色界也如是等身大小相以智能知知如來身有菩提身有願身者以菩提心起願成身故化身者隨衆生所現故力持身者十力所持故相好身者福智萬行所莊嚴故威勢身者示現摧伏諸我慢故意生身者逐衆生情所欲故福德身者具莊嚴故法身者如虛空故智身者知無邊法故知智身者覺自智及他智故善思量相者任智所知無情識故如實決擇相者以根本智起差別智善決擇義相故果行所攝相

者即一乘從根本智果起普賢願行故世間
出世間差別相者真俗二智悉現前故三乘
差別相者二乘趣寂菩薩生於淨土或云留
惑潤生等事共相者三乘一乘共一無生相
不共相者具慈悲無慈悲名不共相又共相
者凡聖一體具如來智不共相有迷悟不同
故出離相者三乘是也非出離相者一切凡
夫具煩惱者是一乘非此二事有學相者七
地已前菩薩是無學相者八地已後菩薩是
知法身平等相者萬法無性故不壞相者如
智所報得境界故隨時隨假名差別相者即
化身隨樂欲心故衆生非衆生差別相者有
情無情差別相故佛法聖僧法差別相者聲
聞僧緣覺僧淨土菩薩僧一乘菩薩僧差別
相佛亦隨類如之知虛空身無量相以法身

多四

+

起智隨行所感無量色別故周徧相爲法身
智身周徧行亦周徧故其色相亦徧無形相
無異相者悉同體故無邊相者以法身智境
非情限故顯現色身相者明色身無體無依
智自在顯現故已上如前科文中有八段經
文深隱處解之文自具處如文自明大意明
此八地菩薩無功之智所及之用故
○第七佛子已下有十行半經明此位菩薩
於身命財十自在無過失分釋義中約分爲
三段 一佛子已下至法自在有兩行半經
明此位已成就如上身智已得十自在分
二得此十自在故已下至無能壞智者有一
行半經明得四種智自在分 三此菩薩已
下至積集一切佛法有六行半經明此位菩
薩以無過失身口意業隨般若波羅蜜能集

多四

十一

一切諸法分經云命自在者於不生不滅大智體上同一切衆生受生死自在故心自在者隨無念智所作能辦故餘如文自具

○第八佛子菩薩住此地已下至於諸事中無有過咎有九行半經明此位菩薩得住十

種力分如經自具云一切種一切智智者一切種者明加行具修多種智故一切智者是根本智或云一切智智者明從根本智起差別智意明以根本無功用智作種種多功用智無二故智現前故者明如土自在智現前故此菩薩已下明得無功之智力故能現一切諸所作事中無有過咎以智無能所故

○第九佛子已下一段有六行半經明不動地隨德用具十種名分其地名義如經自明如一切世間無能測故名童真地明七地已

前有行有開發是世間智此八地無功之智現前故是初童蒙入真智故號曰童真地無過失故名爲生地者明有覺有觀已絕無覺觀刺之所傷故故云生地以生在無功用智中故餘如文自具

○第十佛子菩薩已下一段有十行半經明此位菩薩入佛境界得佛護念梵釋四王力士隨侍普伏魔道住不動地分於此段中分爲兩段 一佛子菩薩已下至示成正覺有五行半經明此位菩薩入佛境界自力所持

感招梵釋四王等常隨侍奉分 二佛子菩

薩如是入大乘會已下有五行經明入一乘無功用會獲神通隨意自在分常爲如來之護念者明諸佛非不護念一切衆生及斷善根之輩其護念有三義一護念苦道衆生未

發心者二護念已發心者有學有開發者三
 護念入無功用菩薩令得佛自在故梵釋四
 王金剛力士常侍衛亦有三義一侍衛一切
 眾生二侍衛已發心之者三侍衛已至無功
 用智及一切諸佛故如侍衛有二義一大悲
 覆育侍衛二入位菩薩以尊敬彼法侍衛如
 多四
 十一
 一一身大勢力報得神通者七地已前是修
 生報業神通未得自在此地無功之智報業
 神通廣大自在七地已前報業神通依禪定
 願力生此地報業神通無作智主無修作依
 放大光明者所作障亡故放光明自應入無
 礙法界者諸作已亡故任智用故智無有礙
 餘如文自具

○第十一佛子已下一段有三十二行半經
 明此位菩薩知見廣多及受職分約分爲四

段 一佛子已下至善能開闡智慧門故有
 十三行半經明此位菩薩見佛廣多及舉真
 金治作寶莊嚴喻分 二佛子已下至不可
 窮盡有六行半經明此位菩薩普放光明及
 所行之行願波羅蜜增上分 三佛子已下
 至一切智智依止者可有七行經明此位菩
 薩受職及行諾波羅蜜四攝四無量不離三
 寶分 四此菩薩已下至而說頌曰有五行
 半經明此位菩薩以無功用智起精進力所
 得三昧及願力所示現菩薩眷屬廣多分

○第十二七地修治方便慧已下至經於億
 劫不能盡有四十四行頌明重頌前法如文
 自具

大方廣佛華嚴經論卷第三十四
 音釋

誼 許元切
 誼 元切
 誼 補各切
 隙 豈逆切
 蟻 居豈切
 積 古猛切
 肘